

Dictada occitana dels país de Riom, Maciac e Sant Flor

« Amont al país gençana »

D'après un poèma de Jòrgi Maurici Mauri, *Flors d'Espinetas*, p. 131-132, Edicions La Cabreta

Al mes de Junh quand la gençana
Es a florir per las montanhas
Del Puèg Marin al Suc de Rond
E de la Font-Santa al Limon
Anatz doncas chaminar amont
Amont dins lo país gençana.
Dejós l'agait estabosit
De la regalécia blava
Que demòra a badar aquí
E dejós l'uèlh atendresit
De las pensadas modèstas
Per li faire la reveréncia
Prèstas a baissar la testa
Corsatge emplenat d'aur dubèrt
Cotilhons verdes naut troçats
La gençana altièra se dreïça.*

Talha prima tèsta quilhada
Reina e fièra dins son pòrt
Apimpada, coronada

Filha de Margòt la reina
Reina aimada dels pastorèls
Pastorèla amada dels reis
Parada de sos joièls d'aur
Dins sa rauba verda rebussada
E amb son bavarèl florit
Mai crane simbòl del país
La gençana del país nòstre
S'apresta a dançar la borrèia
Crana dança del país nòstre.**

Quand a través de las fumadas
Seguida del tropèl dels vedèls
Coa sobre l'eschina dreïçada
Qu'espingan al mièg de las gençanas
Al son d'estiulas e garlandas
La valchèira de Salèrn s'alanda
Quand l'alausa chanta al cial
Que l'aire odora lo mial
Anatz chaminar per las montanhas
Amont dins lo país gençana.***

* Fin de la dictada dels debutants (43 mots).

** Fin de la dictada dels mejans (138 mots).

*** Fin de la dictada dels confirmats (190 mots).